

## **PEMASYHURAN DARIPADA TUAN YANG DI-PERTUA**

### **PENYELARASAN URUSAN DEWAN RAKYAT BERIKUTAN PENULARAN WABAK COVID-19**

Ahli-ahli Yang Berhormat,

Sepertimana Ahli-ahli Yang Berhormat sedia maklum, kes penularan wabak COVID-19 ketika ini terus meningkat. Dalam menghadapi gelombang ketiga pandemik ini, langkah-langkah pencegahan dalam memastikan persidangan Dewan Rakyat dapat dilaksanakan dengan selamat akan terus dipertingkatkan.

Sehubungan itu, **Mesyuarat Penyelarasan Urusan Dewan Rakyat Berikutan Penularan Wabak COVID-19** telah diadakan semalam bagi membincangkan perkara-perkara berkenaan dengan urusan Dewan Rakyat sepanjang Mesyuarat Ketiga, Penggal Ketiga, Parlimen Keempat Belas.

Mesyuarat ini dipengerusikan oleh Yang di-Pertua Dewan Rakyat dan dihadiri Ketua-ketua Whip seperti berikut:-

- 1) Yang Berhormat Gombak;
- 2) Yang Berhormat Bera;
- 3) Yang Berhormat Petra Jaya;
- 4) Yang Berhormat Kota Bharu;
- 5) Yang Berhormat Arau (yang juga mewakili YB Bagan Datuk);
- 6) Yang Berhormat Pasir Puteh;
- 7) Yang Berhormat Seremban;
- 8) Yang Berhormat Sungai Petani;
- 9) Yang Berhormat Hulu Langat; dan
- 10) Yang Berhormat Labuan.

Dengan mengambil kira nasihat dari pihak MKN dan KKM serta syarat-syarat PKPP (CMCO) Ahli-ahli Mesyuarat tersebut telah **BERSETUJU** dengan keputusan seperti berikut:

- 1) **Perubahan waktu persidangan** dan urusan mesyuarat mulai Isnin, 9 November 2020 sehingga Selasa, 15 Disember 2020:-
  - a) **Dewan Rakyat akan bersidang bermula jam 10 pagi hingga 2 petang;**
  - b) **Sesi Pertanyaan-pertanyaan Bagi Jawab Lisan** pada hari **Isnin dan Rabu** ialah selama **1 jam** dari **10.00 pagi hingga 11 pagi**. Pada hari **Selasa dan Khamis Sesi** Pertanyaan-pertanyaan Bagi Jawab Lisan ialah selama **55 minit dari 10.05 pagi hingga 11.00 pagi**. **Hanya satu (1) soalan tambahan** dibenarkan dan soalan tambahan tersebut mestilah ringkas yang boleh; dan
  - c) **Waktu Pertanyaan-pertanyaan Menteri (MQT)** pula akan dilaksanakan setiap hari **Selasa dan Khamis** selama **5 minit** dari jam **10.00 pagi**. Ahli-ahli Yang Berhormat berkenaan akan membacakan soalan beliau dan Yang Berhormat Menteri berkenaan akan menjawab **secara bertulis pada hari yang sama**. **Soalan dan jawapan tersebut akan disiarkan** di portal Parlimen Malaysia secepat mungkin.
- 2) **Perbahasan di peringkat Dasar Rang Undang-undang Perbekalan 2021** selama **8 hari** iaitu pada Isnin 9 November, Selasa 10 November, Rabu 11 November, Khamis 12 November, Isnin 16 November, Selasa 17 November, Rabu 18 November dan Khamis 19 November 2020.

- 3) **Jawapan Menteri di peringkat** Dasar kekal selama **3 hari** iaitu pada Isnin 23 November, Selasa 24 November dan Rabu 25 November 2020.
- 4) **Perbahasan di peringkat Jawatankuasa** selama **11 hari** iaitu Khamis 26 November, Isnin 30 November, Selasa 1 Disember, Rabu 2 Disember, Khamis 3 Disember, Isnin 7 Disember, Selasa 8 Disember, Rabu 9 Disember, Khamis 10 Disember, Isnin 14 Disember dan Selasa 15 Disember 2020.
- 5) **Jumlah hari persidangan Mesyuarat Ketiga** ini **boleh ditambah sebanyak 2 hari** iaitu pada Rabu 16 Disember dan Khamis 17 Disember 2020 **sekiranya diperlukan**.
- 6) Untuk makluman Ahli-ahli Yang Berhormat, jika Dewan Rakyat bersidang hingga pukul 5.30 petang dengan susunan Aturan Urusan Mesyuarat seperti sedia ada, maka selama **89 jam dan 30 minit** diperuntukkan oleh Ahli-ahli Yang Berhormat untuk membahas (termasuk jawapan oleh YB Menteri-Menteri) dalam mempertimbangkan Belanjawan 2021 di peringkat Dasar dan Jawatankuasa. Dengan **peraturan yang baharu** ini maka tempoh perbahasan oleh Ahli-ahli Yang Berhormat (termasuk jawapan oleh YB Menteri-Menteri) dalam mempertimbangkan Belanjawan 2021 di peringkat Dasar dan Jawatankuasa adalah selama **66 jam**. Walaupun terdapat pengurangan dari segi tempoh perbahasan dan jawapan tersebut namun Ahli-ahli Yang Berhormat masih mempunyai tempoh yang mencukupi untuk mempertimbangkan Belanjawan 2021.

- 7) **Kehadiran Ahli-ahli Yang Berhormat** sepanjang tempoh persidangan Mesyuarat Ketiga (termasuk pembentangan Belanjawan 2021 pada Jumaat ini) adalah seperti berikut:-
- i. Dihadkan kepada **80 orang sahaja** pada satu-satu masa di dalam Dewan Rakyat (termasuk Ahli yang akan berbahas) dengan **pecahan pembahagian 41 pihak Kerajaan dan 39 pihak Pembangkang dan Bebas**; dan
  - ii. **Penentuan Ahli Yang Berhormat yang boleh berada** dalam Dewan akan **ditetapkan oleh parti masing-masing**. Setiausaha Dewan Rakyat akan memberikan **Kad Khas** tersebut kepada **Yang Berhormat Kota Baharu** untuk selaraskan kehadiran di pihak **Anggota Pentadbiran** dan **Ahli-ahli Backbenchers**. Manakala, di pihak Pembangkang Kad Khas ini akan diberikan kepada Yang **Berhormat Sungai Petani** untuk kehadiran **Ahli-ahli Pembangkang dan Bebas**.
- 8) Sehubungan itu, Yang Berhormat adalah dipohon mengambil perhatian berhubung **rekod kehadiran** seperti berikut:
- i. 80 orang Ahli Yang Berhormat yang **diberikan Kad Khas** boleh merekodkan kehadiran di **komputer riba** masing-masing seperti kebiasaan; dan
  - ii. Ahli-ahli Yang Berhormat yang **tidak diberikan Kad Khas** pula boleh merekodkan kehadiran di **Pintu 3 Blok Utama dan pintu masuk Blok Ahli Parlimen dan Pentadbiran** dengan bantuan Bentara yang ditugaskan di kedua-dua pintu tersebut untuk mencatatkan kehadiran Ahli-ahli Yang Berhormat.

- 9) Manakala bagi **proses pengundian belah bahagian**, loceng akan dibunyikan selama dua (2) minit diikuti dengan penempohan selama sepuluh (10) minit dan kemudian loceng dibunyikan selama dua (2) minit lagi sepertimana yang telah dilakukan pada Mesyuarat Kedua, Penggal Ketiga, Parlimen Ke-14. Untuk proses ini, kesemua Ahli-ahli Yang Berhormat dibenarkan untuk berada di dalam Dewan.

Ahli-ahli Yang Berhormat,

Saya sekali lagi memohon jasa baik dan kerjasama semua Ahli Yang Berhormat untuk sentiasa mematuhi SOP Persidangan Parlimen yang ditetapkan oleh pihak MKN dan KKM bagi kebaikan kita bersama. **Langkah-langkah yang diambil ini adalah untuk tempoh sementara sahaja** demi untuk mengimbangkan tanggungjawab Ahli-ahli Yang Berhormat di Dewan yang mulia ini dengan kepentingan menjaga kesihatan Ahli-ahli Yang Berhormat semasa berada di Parlimen berikutan penularan wabak COVID-19 ketika ini. Ia adalah demi kebaikan dan kemaslahatan semua pihak agar kita sama-sama terhindar daripada wabak yang membawa maut ini.

Sekian, terima kasih.



**DATUK AZHAR AZIZAN HARUN**  
Yang di-Pertua Dewan Rakyat

5 November 2020